

嘉慶新修江寧府志

新修江寧府志卷之三十九

人物志六 仕績下

國朝葛黃裳字中文高淳人由拔貢選河南太康知縣太康當天下之衝大兵往來軍需浩繁黃裳請於上裁減之又河工供億歲有柳稍車輛之令黃裳爲革浮派嚴胥詐委曲籌畫上不虧額而下不病民尋以勞致疾卒於官子長祚字燕翼康熙乙丑授杭之新城令首葺學宮以興教化通梁築堰以資灌溉邑故有典質婦女俗長祚力爲禁止尋行取授戶部主事卒於官

李敬字聖一其先吳縣人世居六合竹墩里祖雲鵠有

篤行嘗拾遺金還客葬蘇人之客死者使無暴露年八十有七卒敬中順治丁亥進士授行人考選廣西道御史多所建白出按湖廣兵燹之後請免租稅改折黃絹民皆便之以軍功歷陞刑部左侍郎和衷詳慎出入稱平丁內艱歸以哀毀疾卒著有學詩錄

朱之翰字鶴門上元縣人順治丁亥進士初知蠡縣有白頭賊作亂之翰輕騎抵賊巢諭以禍福賊感泣請降尋改調平湖收伏泖湖賊錢大歷陞禮部精膳司郎中出視河南學政致仕歸

史允琦字蒼航江寧人順治間進士由興化推官累官

至按察司僉事急軍需拯民艱去吏弊絕請託舉賢良  
所在有政聲卒祀鄉賢

孫奏字廣伯高淳人順治辛丑進士補司李奉裁改知  
巴東縣遷潮州平遠縣甲寅閩亂作奏率鄉勇鏖戰獲  
斬僞總兵林清袍乙卯又斬僞游擊洪省經丙辰粵叛  
奏力戰潰圍赴贛請援陞貴州平遠府改授浙江台州  
府以興利剔弊爲己任勸課農桑敦率孝弟卒祀鄉賢  
著有二懷堂稿及紀游草

胥庭清字永公上元人以孝友聞順治丁亥進士令餘  
姚時賊徧山野庭清單騎入山撫之四境以寧擢工部

權龍江關尋致仕歸

陳嘉善字伯敬上元人性孝友繼母鄭氏苦節訓之極嚴嘉善承順無異詞登順治己丑進士歷官分守金衢道參政以廉惠著聲卒於官至無殯葬之費

魏博字約之上元人父豹官將軍以忠節著母屠氏殉節博依襄壯公張勇以軍功授枝陽令時軍務劻午博首興學校明禮義三年中丞華善題授固原州牧辭不赴遂致仕歸

胡順忠字將美上元人以孝聞登順治己丑進士初授溇州知府兵燹之後招集流離民爭附焉尋以薦補南

安府捐俸修文廟葺城垣造橋梁俱不勞民而事畢尋致仕歸

楊士元字屆先上元人順治辛丑進士任東河令修學課士蠲革供派轉洧川尋擢沔陽牧沔濱江田多沈塌民苦虛糧逋累力爲申請得免

皮大夔字堯臣上元人順治時武科舉人初任常州府城守都司凡師徒徵調夔額憲請

旨不令入城民得安堵歷官靖江水師參將

路汝前字進公江寧人以拔貢授江西龍泉縣邑故多盜營兵素通賊內外爲患汝前移會鄰邑同力嚴防屢

獲賊諜賊首王打鐵俯首就縛且云深山中間路公仁廉但得一見好官死且不怕賊既定邑苦荒糧荒糧者邑爲山賊所踞田畝半爲荒莽前令并荒于熟民不聊生汝前力爲申請卒得准免

張明熙字贊皇句容人崇正戊辰進士授廣東高要縣知縣時賊寇李之奇等肆行闖廣明熙籌畫軍實擒斬賊首劉香老又獻策擒山賊陳萬謝廷桂鍾凌秀等尋擢銓部晉廣東嶺南道副使破臨武擒獲僞官朱衣點楚地以寧又平清遠峒賊嶺南肅清尋轉閩中興泉道副使又平仙遊山寇加太僕寺少卿致仕歸

胡允字寧伯句容人順治己丑進士任廣西慶遠府知府慶遠初入版圖允以文臣借經畧洪承疇勦賊多所參決尋補臨江府知府捐建學校又勘石田以清荒賦政教一新陞湖廣兵備副使晉雲南布政使卒於官

張效齡字子長句容人順治初以選貢補同安令同安濱海寇盜出沒無常時鄭成功犯境效齡率鄉兵禦之邑賴以無虞尋致仕歸

徐惺字子星上元人順治間進士官山東兗東道所部有盜賊屯聚惺自入其寨告諭之乃皆就縛道路寧謐

巡按河南歲除釋囚歸約曰開春可來囚卒赴無逸者



擢湖北布政司尋罷歸

戴夢暘字大來溧水人任廣東高州府通判遷廣州府知府陞任雷廉道以慈惠愛民稱未幾卒從祀鄉賢王自新字紫蘭句容人順治乙酉舉人任通州學正時海氛薄城自新憤然曰我雖無民社責忍坐視以負

國恩乎乃遴選壯士激以忠義躬冒矢石晝夜登陴巡視賊衆引退州民以安陞國子監學正歷山西司郎中晉官僉都御史提督湖廣學政卒於官子輅字大席任吳縣教諭歲飢捐金賑濟轉歛邑教諭以卓異銓補沂陽縣令邑地生火焰草飢民食之暫飽尋卽殞命時縣倉

有鳳翔貯穀四千石輅請於監司暫貸以爲賑救大吏不可格曰吾卽以一官救萬民命雖死亦幸竟發倉貸於民民賴全活至秋不俟催科悉如數交納以喪歸卒於家從祀鄉賢輅子緡亦以孝行聞

重光字在辛句容人順治壬辰進士授刑部員外晉郎中恤刑關中擢湖廣道監察御史巡按江西時有一人以斃五命繫獄重光廉得其情知爲讐家所陷遂釋免尋忤當事罷歸居潤州海寇犯城重光縋城請援事平

勅賜功宣屏翰匾額卒從祀鄉賢

朱獻醇初名朝幹字亮工句容人順治甲午鄉試第一授射洪縣令居官潔清政聲茂著以病歸故事句邑歲舉區頭一人任徵徭不半載必以破產醇請於當事勒石永禁卒從祀鄉賢

笄昌齡字蒙衍句容人由選舉任江西饒州府萬年縣知縣攝府判官值江右寇亂所存活掠賣男女甚衆卒祀鄉賢

王運啟字開之溧水人順治間任全椒訓導爲明經續旣絕之後爲士人完欲棄之妻人咸義之

周從謙溧水人初值湖南阻絕滇黔梗化之時建策開

復辰沅擒斬賊首姚黃順治十三年授辰州沅陵知縣  
招集流亡奪賊糧二千餘石授辰州府知府歷任宣府  
建昌柳州太原河閒福州諸府同知超擢監司卒於官  
王上林字聖修高淳人順治初任浙江湖州府總巡水  
利督理糧儲釐政添設同知旋攝本府暨歸安烏程印  
務時寇盜充斥賄賂交通莅任者悉以賊罪去上林獨  
清白無所染湖人思其德立祠祀之

葉灼棠字函公六合人順治閒試博學宏詞授中書舍  
人從征閩海有功擢福建興泉兵備道捐俸濟飢時盜  
賊充斥灼棠細案賊窟盡得其名出兵四捕獲其渠數

十人築汎海濱日飭戰具治軍書不假手胥掾是以謀者罔知虛實眉州嶼有屯賊五千人灼棠與鎮將夜擊之斬俘千餘級餘黨解散興泉兩郡遂定著有嵩巢詩集興泉政略心學宗元等書

吳煥然字鍾闇上元人司訓徽歛貧生邵邈爲仇所陷司理欲置之劣行鍾闇力昭雪之邑人程自勝祖塋善地也富室江良賄縣誣斷歸江氏太守發學勘視江良以五百金爲壽煥峻拒之仍以其地歸程氏

黃紹琦溧水人由進士任河南開封府教授會有河工之役上憲委紹琦監視琦蚤夜勸勉有情者則身先之

遂以積勞成疾卒

司徒珍字中子溧水人任山東濟陽令孝子張魁仁爲  
讐所陷幾坐死珍力爲昭雪有被殺而亡其首者珍研  
訊不數日得凶首伏罪

王吉人字天與六合人任廣東閩鄉令閩故隸湖俗悍  
難治吉人以德化之民咸乂安以喪歸起復補山東清  
平縣有廉惠聲子守敬任鄱陽縣再任閩羅源縣以峭  
直拂上官意罷歸

施鴻字沛九上元人任信揚州吏目會有大興作將下  
令封民間樹木鴻力言其不可議乃格尋棄官歸

陶敬字肅公上元人康熙丙午舉人由泰興教諭擢博羅令羅俗剽悍多盜不識禮義敬壹以忠誠格人修建學宮義塾刊孝經小學朔望親與士民講習之俗爲之變尋致仕歸

黃大鵬字運滄上元人任廣東平遠縣有能聲調肇慶鶴山縣邑向爲盜藪大鵬至則築城浚池建衙署學宇釐然興舉隣境民之願籍于其土者給田與牛種俾安其業三年而政成

吳伯字大宗上元人康熙庚戌武進士授陝西固原衛守備固原邊陲要地軍民雜處伯撫綏有方催科不擾

尋陞寧夏屯田都聞

陳祥字邃菴上元人以守備督修滿城日役千夫歷兩載始告竣撫恤備至民不知勞以左都督鎮邵陵及荆南俱有聲

吳樹聲字周旌上元人康熙甲辰進士授略陽令值滇南之役盡心撫輯未數月以勞瘁成疾卒

王霖字巖夫號澄齋上元人康熙丙戌進士任湖廣南漳縣浚堰溉田歲以大熟以喪歸起復補蜀之新繁縣尋陞禮部祠祭員外一切郊廟祭告之儀參酌經義悉爲釐訂尋致仕歸



周天成字織旬上元人康熙壬子舉人任東莞令筦抵海門每西水迅發滙獅洋水奔騰潰決民田盡沒天成相視高下築隄捍水民咸利之陞惠州守惠州蠻音悍俗天成至則加意撫綏民用乂安尋致仕

楊以寧字宗堯上元人康熙間知溫江縣浚河渠築江安二堰歲用大豐招撫蠻酋部落十九處署上考特陞廣東肇慶府知府爲忌者所中罷歸

王鐸字禹齋金陵人任雲南司馬陞徵江守地有河踞撫仙星雲二湖之咽喉河陽等三縣之田糧所係自天啟元年築壩越百三十四年壩傾河塞鐸力請上憲發

公項外捐俸興工工成民勒石紀其事尋調廣東雷州府陞海南副使卒於官

孫元字芝田上元人任湖南衡州守調長沙守會湖南米價騰踴開倉平糶百計變通逾月而價平滇苗肆逆軍糧取辦於楚元籌畫飛輓不誤陞陝西潼商道尋調延綏道以母老乞歸

陳昌會字聚野一字菽汜上元人康熙間以鄉薦補亳州學正州舊以地糧追比滋擾昌會力爲詳請獲免亳州數罹水患昌會每司賑給編查戶口釐剔奸弊尋以勞致疾卒於官

陳大音字正希上元人任湖南衡陽令多惠政康熙乙卯通丈湖南一省民田於時牧令競以增賦迎合上官大音按畝清丈既無欺隱亦無包賠民咸德之

董三策字繼舒江寧人康熙癸丑武進士授遊擊鎮瓊之萬州辛酉海賊犯海口陷定安城三策身先士卒九戰皆捷招服生黎二十五寨生岐二十七崗斷賊歸路深入進勦黎山故深險多障毒三策竟以勞成疾卒垂絕之時猶大呼殺賊者三軍民立祠祀之

王易學字仲賢句容人康熙間任陝西隴西縣性剛直興利除弊會鄉試入闈或囑以私易學嚴拒之尋爲忌

者所中罷歸著有漫遊草

周楨字鹿崖句容人康熙壬辰進士授內閣中書改授  
湖南通道縣知縣招集流亡撫綏苗人尋署綏寧獄多  
滯囚楨至卽釋放百餘人踰月疑獄皆結所定必當罪  
邑素患猺虐至於傷人掘塚楨練鄉壯防守民賴以安  
謬沖花苗作亂楨破斬之遂定生苗陞直隸靖州知州  
著有存青閣詩集

王康劼字薛田句容人任湖北漢陽通判豫省歲飢流  
民競入漢川康劼捐米賑給復構室數百椽使居焉尋  
以終養告歸起復終湖南州倅

謝天璘字庭玉溧水人康熙閒任雲南富明縣革除陋習十六條擇地建學宮疏溝渠以溉民田人咸誦之

端木象震溧水人以例授中翰從征貴州督餉有功以同知攝貴州府事陞黔西知府改補都勻府知府西苗之畔率兵直搗其穴不數月授首黎平繼叛獨決首惡餘俱釋免尋調廣州府知府致仕歸弟象謙任江西彭澤縣知縣輕耗羨除雜派禁盜詰奸惠聲甚著

邢振岳字畏之高淳人以選拔授金華令婺鄰於閩初耿逆未著各弁出貸其地權子母積息數十萬民鬻子女苦不足償振岳請于監司將以上聞逆弁乃讐慄棄

券而歸葵額南米三千餘石例解溫台寧紹運費數倍  
解戶往往破產而司胥以轉撥漁利堅不可移振岳委  
曲申請卽以米給本邑防兵撥解之害始除尋補陽曲  
縣邑有龔勝雲者家十餘口已定入逆案將就磔振岳  
訊知其枉力爲昭雪貢生戴廷杖馬如龍等百餘人因  
忤鄉貴被誣以逆叛論振岳廉得其情沈寃以伸後以  
邛州守告歸

陳悅旦字昇如高淳人康熙壬戌進士授內閣撰文中  
書尋出爲杭州同知政尚嚴肅聽斷明允歷攝嘉善海  
鹽於潛樂清四邑篆一署衢州府事清查畝田釐剔漕

弊修葺文廟建置津梁政皆卓卓可紀著有樂在堂文  
文詩集

王傑字士先高淳人康熙壬辰進士授山西汾州府平  
遙令會邊境噶爾旦跳梁傑扈

駕出征凡承辦軍需量其緩急民無重困以報最行取工部屯  
田司主事尋補禮部祠祭司主事入見擢戶科給事中  
糾罷臨清北新兩關監督時杭州四務關歲增稅四萬  
餘傑上疏邀蠲晉禮部都給事中又明年兼掌登聞鼓  
事著有易經注解

王孚字容若高淳人康熙癸未進士授閩之連江令嘗

勸民墾荒坂皆成沃壤仿社倉法爲儲蓄以備歲飢故  
事邑令歲時諸浮費悉派里圖供應孚嚴禁之邑有盜  
薛彥文聚衆孚點兵截其要路獲其黨縱之使爲導遂  
得入其巢穴擒三十餘人有陳漢達者人誣以藏僞劄  
孚廉得其情卽爲請釋莅連九年福州守楊君行縣問  
囚數對以一人守爲改容稱異未幾卒於官

孔毓儀字端蒙高淳人康熙癸未進士授中書舍人知  
直隸豐潤縣以喪歸起復補四川溫江縣改山西文城  
縣值大旱道殣相望毓儀捐俸給棺木邑有積穀萬石  
太原守行牌撥賑鄰縣不應盡發散給本邑飢民除吏



之積蠹者一人人稱神明尋署文水縣奉檄賑平遙介  
休兩縣災查核不遺調潞安府潞城縣致仕歸

劉朝講字石平高淳人康熙丙戌進士任湖廣孝感令  
邑民有納妾外舍者已生有子女一日以嫡妻嫁女始  
一歸行慶禮妻惓然爲具飲食妾旋以心痛竟死妾弟  
訴於官妻已誣服朝講廉得其情獄乃平反又嘗捐俸  
修治邑城劇盜劉四聚衆鳴鏑殺人朝講設法捕治之  
境賴以安

張必新字命之高淳人康熙丙戌進士知渭南縣至則  
修建學宮除減耗銀尋以喪歸會淳邑大澇倡義捐穀

五十石全活甚衆

周于漆字西水江浦人由選貢授懷柔令改補密雲邑  
鄰邊陲民產半爲戍卒所侵漆嚴禁之間者愧懼盡還  
侵地陞兵部督捕司主事轉戶部郎中擢汾州守卒於  
官

汪佃民字永思六合人康熙己丑進士任山東費縣知  
縣愛民減耗修築湖隄運糧塞外皆有成績

郭椿字馥之六合人康熙十四年以把總從征吳三桂  
復樂安城十六年從征芳塘賊又殺賊楊梅州四千餘  
人恢復武岡州及鎮遠等城累功加都指揮使二十六

年授福建海壇鎮游擊三十一年陞澎湖協鎮以勞卒  
張秉亮字熙人世居龍江關康熙壬辰進士充翰林院  
纂修官性耿介遇人謙退及談古今人物高下歷代治  
亂瞭如指掌卒祀鄉賢祠

張宗仁其先陝西人靖逆侯太子太保張勇之孫勇以  
甘肅總兵官討西羌平回逆又定兩湖取雲貴晉雲南  
提督又以平三藩功加太子太保封靖逆侯子雲翼  
大理寺正卿襲爵後提督閩江加太子太保兵部尚  
書至宗仁襲封遂家金陵

賜第於大中橋

聖祖南巡嘗

幸其宅青海之役宗仁捐馬助餉

上嘉其忠尋卒子謙少時當雍正年嘗侍

高宗讀書後襲爵孫承烈於乾隆二十二年以勳臣子奏請  
効力

欽賜藍翎侍衛歷官甘肅游擊三十一年率西寧寧夏固原三  
鎮屯田新疆預平遣犯之亂晉官參將襲爵卒於官

孫謙字文益高淳人任六安州學正擢知湖廣善化縣  
事縣自平吳逆經兵燹戶口逃散謙以恩信招集閉墾  
民用安堵以喪歸服闋補貴州永從縣縣有六洞爲生

苗語言不通租稅須官親往往必有備苗亦集洞口約  
言合得入不合則不得入謙獨率僕從數人以往諸洞  
苗咸欣悅相迎送稅無稍後以卓異行取戶部主事監  
鹽倉兩場無私羨尋轉員外郎遷刑部郎中謙宅心平  
恕後以輕擬總兵高天培事遂降調而謙亦以老請歸  
蔣允旦字清伯高淳人任博白教諭縣有邪教曰肉齋  
每朔望及子午卯酉期男女夜聚曉散巫覡分沓允旦  
嚴禁絕之嘗捐俸置義社建學署尋陞桂林教授卒

吳之樞字天水江浦人授中書舍人遷戶部郎中出守  
浙江紹興府署寧台道時土寇蔡和尚等不靖督師勦

除三郡以安

袁縝字慶昭六合人任涿州房山縣知縣能斷疑獄旗人奪民地七百畝請於上官悉以歸民檄委來安賑濟全活甚多

孫超字豈凡六合人任豐縣教諭陞德清知縣凶歲捐俸濟飢超泣請於上官借種加賑民賴以生

孫暉字東暘六合人任四川邛州知州州多囑嚙屢爲民患暉莅任卽設方略盡獲而置之法尋補重慶府同知

蔡謹字經山江寧人雍正癸卯舉人任貴州施秉縣值

苗亂邑無一兵寸甲民間警盡逃謹招納散亾合僕從  
得百餘人親爲教練登城捍禦苗將以夜攻城謹先歛  
得民間香數萬束盡蒸城上賊見火不敢逼又將由水  
竇謹誦知預以釘板鐵錐埋置要路賊跣足行皆顛踣  
不能進苗將氣奪四散城以獲全晉官大定府通判奉  
檄勘災軍營受瘴氣卒民哭之爲罷市

張嵩字宣四江寧人性亢直不能容人過秉鐸宣城所  
得廉俸自奉之外悉以贍諸生旣歸竟以貧終

王嘉會字履安五世祖拱自太原遷金陵嘉會中雍正  
癸丑進士歷官四川羅江浙江蕭山知縣卓異陞陝西

同州府知府改調西安府嘗言居官當爲民請命爲國得人其訊案也每日必以十案爲率嘗曰吾不得使民無訟惟早爲完結庶免小民疲累耳初任蕭山邑爲潘水所出故多水患嘉會捐資浚河以工代賑民賴以安至西安興舉蠶政迄今秦緞秦綢媿於南省焉

陳士芳江寧人初爲某縣教諭遇邑有重災士芳以賑濟請於邑令令語以必俟詳請而後可行實不爲詳請也越數日士芳請出印文借倉穀一千石令又不報乃遣人回籍貸千金急糴米赴學量人散給令乃大惡之竟以沽名惑衆報事聞



聖祖優詔嘉之而坐縣官罪尋擢同知轉科道士芳不避權貴  
風節凜然累官至大理寺卿

蔡錦字春田溧水人中雍正丙午科鄉試任浙江諸暨  
縣邑當義浦下流之衝田多淹沒錦至爲疏濬之調任  
縉雲縣有俞通才者或利其產令其叔母聲言通才強  
姦已鍛鍊成獄錦廉得其情立爲昭雪尋以喪歸起復  
遷湖北長樂縣他邑飢民有至者錦令於山中刷黃精  
百合爲食每日人給穀一升且俾擇平曠地治茆屋以  
居又令採藥人販賣流民皆樂業焉

徐元肅字夢符上元人雍正癸卯舉人授浙江孝豐縣

調補台州太平縣縣濱海元肅築三壩以禦潮詳請大吏於松門設巡檢以防盜卓異陞玉環同知署台州府以勞瘁卒於官子祖貽字蓀谿以孝友聞

葉均字陞平上元人由工部掾考滿發南河乾隆二十八年補寶應縣主簿分管運河四十里其閒爲閘者四爲涵洞者五受閘與涵洞水以轉輸於湖蕩者爲閘洞河頻河之田旱資灌溉澇賴宣洩往時水小則慎閉以濟漕而民苦旱水大又宣泄以保隄而民苦潦均相時緩急調劑有方民咸利之丙戌夏大水淫雨月餘河漲民田皆沒均以閉閘爲通判所劾河督召問狀均曰

皇上軫念民隱於高郵之壩立椿以志曰水不至椿三尺勿開壩今水未至三尺奈何以民爲魚耶河督嘉其言亟閉上游三閘以過來水田禾復蘇秋大熟以終養歸服闋補原官累遷邳州州判

方觀承字遐穀桐城籍江寧人少以家難奔走南北達知天下事工詩文善書平郡王征準噶爾奏爲記室

世宗命以布衣召見

賜中書銜同往雍正十二年凱旋以功實授中書遷侍讀行走軍機房歷吏部兵部員外郎郎中出爲直隸清河道遷布政使浙江巡撫其爲直隸總督最久乾隆十九年西

匪用兵加 太子太保著陝甘總督觀承善知人所委  
用必當敦良者使柔民聰敏者使折獄拔識周元理李  
湖等於縣令之中後皆繼爲督撫稱賢才時各督撫奉  
部議令民自行修城觀承獨奏直隸素多差徭民無餘  
力且又樸野不受獎誘修城之費請發公帑

上從其言磁州逆匪爲亂觀承奏誅三人絞七人

上疑其沽名有所縱弛

嚴旨督責而觀承堅執前議申辨愈力

詔解犯闕下九卿大臣會訊獄詞與所奏無不符合遂卒如其  
議卒於官著述甚多詳見藝文志

袁錫夔字鳳山六合人乾隆丁巳進士選直隸清河令以喪歸服闋補蜀之福順縣調巴縣地當水陸之衝值忠州逆匪爲亂大府大帥會勦忠州必經巴邑錫夔應給芻餉民不以爲擾張關山夙爲盜藪乃捐俸建塘卡招集居民踰年成衆名曰新興鋪行者便之積匪鄧三兄弟劫掠數年錫夔設計擒治之尋署達州卒於官

方求義字質夫桐城籍上元人知贛州龍南縣歷署定南安遠信豐諸縣其署安遠也歲大祲時長官下令謂擅糴倉穀無益災黎而徒飽胥吏之貪壑前令遂因循不敢上請求義喟然曰誠能拯救一邑生民雖忤長官

罷黜何憾急以災狀通牒大府卒如所請由是諸屬相繼請糴其全活不可勝計乾隆九年以葬親告歸明年謁選知南安上猶縣卒於官

王友亮字景南江寧人父文德官平陽府同知友亮中順天鄉試取爲中書舍人乾隆四十六年成進士授刑部主事歷員外擢山東道御史轉禮科兵科給事中嘉慶初累擢通政司參議太僕寺少卿通政司副使生平以孝友聞在官恪敬吏事嘗值軍機又總辦秋審躬任勞苦所建議皆當理巡視南漕撫恤運丁尤有善績著有葑亭集六卷雙佩齋集六卷金陵雜吟百餘首

戴翼子字燕貽號芑泉上元人乾隆丙戌進士授工部主事尋以郎中擢山東道御史凡時事有未盡者知無不言

上將大用或惡其亢直沮之未幾卒於官會工部有分賠之案同官以其賢而貧甚代爲之償而鄉里士大夫爲贖金以歸其喪

朱瀾字問源其先吳人顧氏也明天啟時有以義憤擊緹騎遂周順昌者避匿江寧爲朱氏祖元英康熙乙丑進士官編修父松年嘗舉孝廉方正不就瀾初以從九品發河工知獻縣河間縣晉務關同知瀾治運河有績

上官惡之以報水進解其職會使者出勘河患乃得保  
留尋授天津府同知卓異擢正定府知府再擢清河道  
累署按察司獄有屬吏所不能決者瀾親披訊所定必  
當罪全無辜者甚衆爲獄囚疾設隔別之法令無傳染  
又籌得歲千餘金爲獄中炭薪醫藥之費歲飢總理賑  
救勤察無遺濫會

高宗東巡迎於行在時以水災請蠲魚葦課

上問魚葦宜水而亦須蠲何耶瀾曰水小則魚聚葦生水大則  
魚溢出而葦沒爛故請蠲也

上大稱善尋以事去職久之復原銜以老病乞歸生平嚴持清



節嘗著才識論故其立身治民皆能得其大者要者所  
著待潮書屋存稿四卷又詩三卷待潮雜識二卷歷官  
紀要二卷

侯學詩字起叔號葦園少工詩文事父母以孝聞友於  
至篤乾隆辛卯 恩科進士初選廣東三水縣知縣尋  
調新會所至有聲新會建有生祠捐賑活人尤夥邑人  
建碑紀其事會從長官於舟次治番禺菱塘盜夜縛二  
百人平明將駢戮之學詩乘小艇請宥脅從上官弗聽  
亟解舟去漏已四下復緣隄追長官舟徒步十五里見  
而力請乃誅十數人餘得末減擢廣州澳門同知兼署

監掣過判粵中方立改埠爲綱之法有司設櫃令民間  
舉富人名懸榜拘募於是投匭告密之風乘機搆釁學  
詩力陳其弊毀櫃除榜曉諭通衢人心乃定陞江西撫  
州府知府遽引疾歸年六十七卒著有梅花草堂詩十  
六卷

陳步瀛字麟洲乾隆二十六年舉會試榜第一以庶吉  
士改兵部主事擢武選司郎中步瀛在兵部吏不能爲  
姦尋丁父憂服闋補車駕司郎中授河南陳州府知府  
再擢至甘肅按察使值平涼府鹽茶所回民爲亂黨連  
數郡爲逆者聚於通渭石峰堡總督李侍堯托以追賊

西往靖遠獨留步瀛扼隴上爲守禦步瀛乃盡拘爲逆者之家又擒其分處他縣爲閉應者官軍初戰失利步瀛度賊乘勝必東犯陝西以隆德平涼當下隴之要卽撥固原兵分守賊果東犯不得過會

上命大臣督師至步瀛陳說形勢事理又籌糧饋入險阻皆給逾月賊平以功擢安徽布政使

賜花翎尋陞貴州巡撫卒於官

王銘琮字禮圻上元人祖朝政尙義好施與弟朝德皆以孝友聞銘琮中乾隆甲子舉人累官江西吉安府知府性廉潔有他郡淹滯疑獄憲司委決屏絕侍從聽斷

如神或晝夜據案披訊或叅所犯於署隨時稽察無不  
得其情者捐俸修復白鷺洲書院又訪求歐陽修曾鞏  
之後使肄業焉終浙江鹽運司同知

談官誥字德宏中乾隆己卯舉人任浙江昌化令尋調  
蕭山遇浙江有海災蕭山所被獨重官誥掩埋骨骸撫  
卹流亡動支不下萬金大吏不准報銷官誥乃盡鬻其  
家產更借貸以償之邑中建祠祀焉

范鏊字叔度江寧人寄籍大興乾隆戊子舉順天鄉試  
授中書庚子成進士授庶吉士改補刑部貴州司主事  
陞湖南司員外歷陝西司郎中丁未臺灣林爽文作亂

隨將軍福康安出征遂擒林爽文莊大田凡獲俘囚數  
百人皆屬蓋訊之脅從者蓋悉予矜釋全活者二百餘  
人以軍功

賜戴花翎擢山西道監察御史坐事降主事沅陞刑部浙江司  
郎中壬子甲寅兩典湖北四川鄉試乙卯督學湖南嘉  
慶己未陞鴻臚寺卿擢通政司副使卒於官

龔孫枝字梧生江寧人性沈摯尤嫻武略乾隆甲戌進  
士授江西樂平縣知縣以父喪歸服闋補榆次縣知縣  
晉官山東曹州府桃源軍捕同知桃源地界山東直隸  
河南三省之交盜賊出沒其閒舊設民壯皆畏憚鄉農

孫枝至卽選一二人爲之隊長教以騎射盜賊屏跡又以母憂歸起復補貴州理苗同知苗俗寧謐甲午山東逆匪王倫爲亂中丞疏請來東辦理軍務山陬海澨窮極搜捕事平補授東昌府同知尋坐事被議河帥特疏奏畱河工辦事補授運河同知調任曹單同知癸卯河勢直趨北岸自曹汎三堡至單汎廿三堡水高於隄一尺孫枝督率營弁晝夜往來搶築子埝是時風雨交作孫枝奮然忘生隄內士民爭先救護卒無恙河亦安瀾未幾以疾告歸

高城江寧人乾隆閒由武岡州峽口巡檢歷官乾州同

知苗民爲亂城帥鄉勇數百人深入賊壘擒獲甚多  
方裕曾字光遠桐城籍上元人初任雲南麗江府經歷  
屢署知縣尋署姚州知州乾隆間金川爲逆

高宗命

征緬甸之師征之道出定遠是時裕曾方宰是邑凡軍

旅所需未嘗少累於民致仕歸著有芝稼軒詩集

金鍾江寧人任黔西典史西地僻民不知種麥屢致告  
飢鍾購種教耕冒風雨躬親勸相邑以豐稔

冷震金字怡清上元人乾隆己卯舉人丙戌大挑知縣  
分發閩中攝霞浦篆邑濱海有賈於外洋噶喇巴者二  
十餘人挾重貲歸邏者以盜告震金拘訊諸賈皆駁粟

不能言於是僉謂得真盜矣震金獨溫語詳察詢其里居族姓及笥中所貯物皆歷歷不爽乃曰若等非盜也立釋之以母喪歸服闋補建寧尋調諸羅邑素多命案每訊吏輒召其鄰右及里中稍裕者牽連糜爛震金至爲立碑禁絕之凡吏胥舞弊者必與重懲壬寅以彰化匪徒爲亂震金屢請用兵不得行事平後遂與主撫議者同被逮發往軍台効力卒於戍所

賀鳴諸字律禾六合人少爲方望溪弟子工爲文章乾隆丁巳科進士爲山東泗水縣值歲游飢鳴諸至卽請於大府立法賑濟更編保甲謹防禦民賴以安以父喪



歸起復補山東陵縣某甲歐傷大功服兄前令欲以三人同坐以爲避重就輕之計鳴諸廉得其素行凶暴卒與論抵民咸稱快焉捐俸修明倫堂尋以終養告歸卒於家著有四書正義鄉黨備考等書

司馬駒字雲臯號溶川江寧人由山陽縣主簿歷官至山西布政使嘉慶元年曹單地方河決調山東布政尋晉官河道總督自九月至孟冬寢食河干躬行風雪中督辦隄堰自將弁下逮兵隸役夫爭先効用遂得合龍駒以積勞成疾卒於官

新修江寧府志卷之四十

人物七 文苑

晉王鑒字茂高棠邑人少以文章著稱初爲元帝琅邪國侍郎時杜弼作逆鑒上疏勸帝親征詞旨愷切帝深納之卽命中外戒嚴會弼平乃止中興拜駙馬都尉奉朝請出補永興令大將軍王敦請爲記室參軍未就而卒時年四十一有文集五卷傳於世事詳晉書本傳弟濤字茂略有才華歷任著作郎無錫令所著集五卷三國志序評三卷濤子戡字廷堅亦有才華官著作郎皆

見晉書

宋顏延之字延年琅邪臨沂人與陳郡謝靈運俱以辭采齊名議者以延之靈運自潘岳陸機之後文士莫及事詳宋書及南史本傳

齊顏協字子和晉侍中含七世孫博涉羣書工於草隸飛白事詳南史文學傳

梁紀少瑜字幼瑒丹陽秣陵人本姓吳養於紀氏因而命族早孤幼有志節常慕王安期之爲人年十三能屬文事詳南史文學傳

陳顏冕字元明介然修立爲當世所知其表奏詔誥下筆立成便得事理而雅有氣質事詳陳書文學傳

隋諸葛穎字漢年丹陽建康人年八歲能屬文習周易圖緯倉雅莊子頗得其要清辨有俊才事詳隋書文學傳

唐庾抱其先自潁州徙家江寧開皇中爲延州參軍事後累歲調吏部尚書牛宏知其有學術給筆札令自序拔翰便熟宏奇之事詳舊唐書本傳

許淹潤州句容人博物洽聞尤精詁訓事附唐書儒學曹憲傳

許子儒字文舉句容人以學藝稱事附唐書儒學許叔牙傳

王昌齡字少伯江寧人善詩人稱王江寧事詳舊唐書  
文苑新唐書文藝傳

冷朝陽江寧人能詩善書

按李嘉祐集有送冷朝陽及第歸江寧詩又金石文字記

吳岳祠堂記興元二年于公異撰冷朝陽行書

項斯字子遷江東人會昌丹徒尉

見新唐書經籍志注

能詩

楊敬之贈

項斯詩幾度見君詩盡好及觀標格過於詩生平不解藏人善到處逢人說項斯

殷遙句容人新唐書經籍志注云句容有忠王府倉曹

參軍殷遙硤石主簿樊光橫陽主簿沈如筠江寧有石

拾遺孫處元

全唐詩小傳作孫處立云長安中爲左拾遺神龍初論時事不合歸里開元初薦不

起有詩云漢家輕壯士無狀殺徐延壽全唐詩小傳彭王一遇風塵起介誰守四方

蟠彙次其詩爲丹陽集者

按明王世貞謂江寧唐無詩人周暉金陵瑣事因歷舉庾

抱以下十餘人然其中如康洽許恩孫革但見周賀岑參韓翃贈送之篇耳未聞其人之亦能詩也故今悉不取

南唐盧郢金陵人好學有才藝而膂力過人善吹鐵笛後主試王度如金玉賦郢唱第爲第一徐鉉娶郢妹嘗受後主旨撰文不能就因語郢郢曰願試爲之因弄百鈞石頭以較力鉉視之曰其何能爲郢命筆吏口授而書之鉉大驚遂以郢文進後主曰語勢遒健似非卿作鉉以實對事見馬令南唐書

宋刁衍字元賓昇州人以純澹夷雅知名事詳宋史文

苑傳

洪湛字惟清昇州上元人幼好學五歲能詩事詳宋史  
文苑傳

元楊剛中字志行建康上元人爲文奇奧簡澀動法古  
人而不屑爲世俗平凡語其甥李桓字晉仲同郡人亦  
以文鳴江東事並附見元史儒學楊載傳

楊翮字文舉集慶路人元末提舉江浙學政楊孟載悼  
翮詩云八分書古追東漢七字詩工到盛唐

明夏煜字允中江寧人好學有俊才以詩名太祖召置  
幕下爲中書省博士伐陳友諒時煜侍太祖草檄賦詩

洪武初總制浙東諸府

李莊字敬中江寧人父爲灤城侯歿於王事莊從劉溥遊刻意詞翰人爭傳之

陶元素字希文上元人正統間進士以親老乞歸養教授諸生不復仕天順成化間歷應浙江河南聘典鄉試號稱得人卒年七十有四

蔣法字惟深上元人成化丁未進士累官參議性樸實孝友少爲諸生刻志勵學有通鑑綱目一部每閱一過卽以一色筆評註凡數閱五色皆備顧起元曰前賢操履清真矯矯人外卽其終身學古無他嗜好亦足見淳



樸寡欲之一端也

顧璘字華玉上元人宏治丙辰進士官至刑部尚書與同里陳沂王韋號金陵三俊事詳明史文苑傳沂字魯南正德中進士官至山東參政以不附張孚敬桂萼改行太僕卿致仕韋字欽佩父徽成化時給事中直諫有聲舉宏治中進士歷官太僕少卿子逢元亦能詩事皆附璘傳璘從弟璵字英玉亦附璘傳

任彥常字吉夫江寧人成化進士提學福建甚得士心宏治改元致仕歸八府諸生赴京請畱不報優游林下十餘年著有克齋稿

蔣誼字宗誼江寧人八歲能賦詩成化進士授杭州府推官擢御史風紀肅清以疾卒著有經緯文衡諸書

謝承舉字子象

通志作謝璿字文卿

上元人父知府芳有孝行承

舉八歲能詩人以神童目之子少南字應於嘉靖壬辰進士博洽有聞好崇獎士類嘗爲廣西提學著有河垣稿諸集

陳元慶字允嘉上元人性孤介不耐圭組以舉人由滁  
州學正陞上饒知縣不赴讀書飲酒雖甚醉猶作朱陸  
中語年七十三卒

楊成字水田上元人登進士官至四川參政工詩多佳

句顧起元云水田公像鐵面劍肩凜不可犯

徐霖字子仁上元人少爲諸生有名然倜儻不羈坐事削籍乃殫力於藻翰書畫皆工名播海外武宗南狩兩幸其居又號髯仙

邢一鳳字羽伯一字雉山龍江衛籍嘉靖辛丑殿試二甲第三人屢官侍講遷太常寺少卿一鳳家居軫念民瘼撰縣碑備述疾苦及吏胥之蠹聞者悚然稱爲名言顧源字清甫一字寶幢京衛籍豪雋不羣究心心性之學浩然有得殷邁馮夢禎輩皆敬禮之善書畫能詩有

玉露堂稿

陳芹字子野羽林衛籍中嘉靖甲午舉人授崇仁教諭時邑令峻刑急斂衆大譁有二生素爲令所恨遂揭於諸司誣以鼓衆司牒提究芹慷慨執詞持不肯發當道是之二生遂得免陞奉新知縣調寧鄉歸築五柳亭邀笛閣於秦淮著忠孝說義諸書

盛時泰字仲交上元人以諸生久次得貢天才敏捷自幼好讀書性骯髒不問家人生產王世貞見其兩都賦贈之詩曰遂令陸平原不敢賦三都和世貞擬古七十章三日而畢見者奪氣子敏耕字伯年亦有雋才

焦竑字弱侯旗手衛籍萬歷己丑殿試第一除修撰事

詳明史文苑傳仲子尊生字茂直亦能詩

朱之蕃字元介上元人萬歷乙未進士殿試第一授翰林院修撰有奉使朝鮮稿南還紀勝諸集之蕃文翰兼工張旌東國與館伴周旋有倡必和

顧起元字太初江寧人萬歷會試第一人殿試一甲第三人歷官國子監祭酒吏部侍郎退居遜園七徵不起友人題曰七台亭先後立朝僅五載耳學問淵博著作精覈畱心桑梓文獻卒諡文莊

周暉字吉甫上元人博古洽聞爲鄉里所重焦竑稱其曾饒蘊蓄性好編錄几格不虛巾箱恒滿吟咏自適不

求人知年八十餘卒著有金陵瑣事諸書

黃居中字明立一字海鶴先世福建人官江寧樂秦淮之盛因家焉十歲能文萬歷乙丑舉禮經魁授上海教諭陞南國子助教遷監丞轉貴州黃平州知州投檄不赴歸居中生平介特不苟甲申闖變年已八十三矣聞之北向號痛衰經不食者累月未幾遂卒遺命幅巾以斂子虞稷字兪邵七歲能賦詩入我

朝以薦授翰林纂修明史及一統志在館十年以給假歸里卒於家著有千頃堂書目諸書

陸澗字霖生號荀叔應天府廩膳生性嗜書尤邃於二

戴及性理尋棄諸生以詩酒自娛

朱可漢字仲源宗牒中名士也善設工詩文顧起元爲立傳

張問仁字子兼號鳳池句容坊郭人幼端敏有至性以拔貢生爲合肥訓導歸杜門卻掃著有國朝名臣履歷瑣碎綴錄五者軒文集家乘年譜百餘卷

張榜字賓王句容人萬歷癸卯舉人書史過目成誦落筆如風雄談雅謔沁人心腑在南國子監舉幡畱祭酒馮夢禎上疏請伏斧鑕以直先生人皆義之

姚敬重字克仁溧水人姚古七世孫也由儒士授本縣

儒學訓導洪武初被薦送翰林院考通五經除駙馬都尉府學錄兼翰林院五經博士獻治政章擢左贊善歷陞左副都御史擢太子賓客卒於京諡文林先生

陳文昭字潛孚溧水人性澹蕩工詩嘗從其族人樂知之任武昌歷馬當小姑潯陽鄂渚間著詩頗富有竹香齋諸集藏於家後卒於客有義僕歸其骨以葬焉

劉楚字景孫溧水人好學不倦善吟咏以詩酒放達終其身有蕉房稿清溪草諸集藏於家

武昂字元績號紆溪溧水人少能文及壯不樂仕孝友端方爲後進楷模有紆溪集惠迪堂詩行世



王可學字景聖號至吾溧水人篤於友于內外無間言  
嘗爲善於鄉歲祲則賑饑掩骼傾其貲不惜萬歷丙午  
以歲貢授當塗學官陞郎陽通判理奇冤多所平反所  
著有易原覆瓿集子民懷有問心集

武尙賓字邦嘉號鶴汀溧水人父暉仕爲台州幕以勲  
倭死尙賓方弱冠抱疏陳情肅宗愍之贈太僕寺丞蔭  
尙賓入監讀書其後中舉人乃請移蔭仲弟尙冕政府  
見而奇之曰此非前日抱疏生耶甚器重之仕爲建寧  
推官定疑案邑無冤獄遷南康同知歸卒年六十四有  
雕蟲雜集行世

魏榮江浦人中宣德壬子科鄉試經魁授訓導歷陞國子監助教翰林院檢討博學能文當時推重

季璘字饒瑞六合東里人正統戊午舉人任河南鄆陵縣教諭改邳縣遂平教諭致仕潛心學問落筆驚人成化丙申知縣唐詔延修邑志詔最爲賢令而璘簡質不阿尤不可及

陸榮字純仁六合西里人孝弟能治家又博通書史黃副使蕭銘其墓曰孝之篤行之毅宜介爾景福家之肅族之睦爲六峯稱獨子璋亦讓產承先志

黃紹文字道甫六合人由貢生授江西南安府訓導陞

福建晉江縣教諭修身踐言表裏如一博物洽聞足備顧問嘗修縣志並廣德州志徵忠錄行於世

章慈字義之廣洋衛人由貢生授浙江龍游縣訓導平生篤故舊辨義利未嘗苟取於人攝邑符多所建白歸老讀書別墅志在立言其私考邑史闡幽揚善並所著學基學統等皆可傳

孫國枚字伯觀原名國光拱辰子六合人幼穎異善屬文由貢生廷試第一上疏請駁正三朝要典詞氣壯烈聞者憚之隨授延平府訓導晉中書舍人歸生平著述最富子宗岱沂如亦能詩文投筆爲武職晚年隱居賣

葉有古人風

汪元哲字魯生六合北三圖人萬歷庚戌進士工詩文能書畫官戶部主事有條議漕運數事皆中竅要出守衢州未任卒

韓仲孝字君陳高淳人爲廩生讀書自守慎干謁唐順之以澹臺滅明稱焉高淳議築城仲孝著難城說數干言止之萬歷丁巳歲大赦詔他府縣改折如高淳仲孝曰以淳爲例而惠不及淳得無向隅之泣乎上書應天府尹奏請於常額外更蠲三之一仲孝生平博洽所著有非齋集行於世

谷再吉字知迪高淳人少讀書淹通經史父以漕運受累再吉奮身詣御史臺抗言夙弊敷陳苦衷臺官嘉而免之歸家閉戶讀書所著有五經纂要周易解周禮注地輿九邊圖諸書

孫維明字克晟高淳諸生氣質清粹著易學統此集二十卷草創未就其子越續成之越字凝元亦諸生闖逆之變凶問至越設位以哭遂掛青衿於澤宮之門隱居教授足不入市者四十年家徒四壁晏如也一旦有誣以頑戶逋糧訴縣者越口吟云今朝得附頑民末猶媿商家義士風知縣崔聞而異之投刺就見越遁年八十

餘卒

邢昉字孟貞高淳人明諸生入

國朝不復應試爲詩最工王士正朱彝尊皆推重之所著  
有石臼集

國朝張正綱字敦五上元人爲諸生敦勵實學嘗曰孔辨  
君子小人孟辨舜黜之徒未有利關不破而可以語爲  
人者所注周禮春秋離騷多所發明同時有張大受字  
與之攻苦食澹嘗與同人舉五經會又有胡其毅者字  
靜夫中書曰從之子曰從年九十其毅就養無方人稱  
其孝性亦澹薄而頗工於詩

朱圻字次郊上元人性峭潔工詩文書翰爲諸生祭酒  
著有夏雲堂天放居集子元英字師晦康熙己丑進士  
官編修詩古文皆工著左傳拾遺元英子松年字枚長  
慈厚好義憫人疾苦以諸生貢入國子監例授州同知  
子瀾別有傳

劉思敬字純之江寧人順治間進士任刑部郎中執法  
無所避分校禮闈得士最盛尋擢參議乞終養修江南  
省志著徹牘八編

倪粲字開公上元人爲諸生卽以淹雅著名康熙丁巳  
舉鄉試應博學鴻詞薦官檢討分纂明史致疾歸同時

程邑字翼蒼順治時舉進士授庶吉士出爲蘇州教授  
遷國子監助教亦纂修明史

紀映鍾字伯紫上元人父青字竹翁家貧氣俠中年後  
輒遠遊映鍾爲諸生工詩喜結納卒之日同里友爲文  
祭之云依隱玩世壯語高姿達官訪以當世之務名士  
題以風流之師論者以爲實錄

白夢鼎字仲調江寧人少與兄夢鼎皆以觸魏忠賢下  
詔獄明亡獄始解夢鼎以前明諸生終夢鼎舉康熙庚  
戌會試第二官大理評事都御史魏象樞以博學鴻詞  
薦庚申補行福建鄉試夢鼎爲考官得士最盛



胡任輿字孟行上元人文筆秀雅康熙辛酉鄉試第一  
甲戌進士 殿試第一授修撰歷陞諭德

方舟字百川桐城人入上元學與弟苞弟林相友愛年  
三十七以病卒遺命兄弟三人同穴而妻皆別葬焉所  
爲經義能入古法

國朝自順治以來士以時文著名甚重至以諸生而文名

被天下惟舟與金壇王汝驤而已同時高淳有張自超

者字彝歎性孝能文嘗著春秋宗朱辨義

高淳縣志作  
述朱茲據四

庫書 康熙癸未舉進士不與館選後浙撫徐元夢疏薦

於

朝以翰林徵入路卒於荏平而舟苞之友又有劉捷二字  
月三亦桐城人流寓上元康熙辛卯鄉試第一會苞以  
南山集案被逮捷爲送其妻子失會試期遂絕意進取  
世尤謂賢云捷兄輝祖字北固康熙庚午舉人第一年  
羹堯少時嘗從之學及貴賚千金延之輝祖標使者出  
諸門外謂其盛滿盈溢將不得以功名終後羹堯果敗  
舟弟林字椒塗亦能文早卒

牛建章字棐臣一字旭峯上元諸生居常教弟子歸本  
於躬行體認爲切要著易經解義二卷纂太極圖說通  
書廣義夢草齋詩藏於家

王禧字元祉一字澹餘上元人事母徐至孝母或不擇輒長跪請解能詩古文所爲金陵賦明史序時人重之吳啟昆字宥函一字新亭上元人康熙辛丑進士由庶吉士改官御史其居京師甚貧然乃行營高廩地葬鄉人客死者又倡建金陵會館是時江寧文學士甚多禮部侍郎方苞嘗爲啟昆墓表云予自成童隨先兄與朋齒游樂其風尚坦夷多修飭之君子劉古塘張彝歎二子外交近焉者曰龔纓孝水季咸若宏舒而比肩於宥函者曰程士馨若韓郭長春蔚瞻

康熙癸巳舉人

十年以長者

曰蔡擎念詒徐佩子遂

諸生六歲而孤長通六籍學者多以胡安定稱之母曹苦節備

極孝養伯母袁氏年十六守  
志無子養之如己母終其身  
黃瑞輯五康熙丙子歲貢  
生官震澤訓導  
著有四書  
年長以倍者曰杜炎亮生朱次郊圻苞之所  
會要錄

次列云爾而是時又有張純心一舉人良鄉知縣奔  
母喪歸哀毀成疾俞

養直集之一一字及萬由銅板館修書議敘授  
朝城縣典史有治聲令忌之去官周勳膚公

著有詩  
黃越際飛康熙己丑進士官  
檢討少以文名徐上登遠康熙癸  
未進士

江西龍南知  
縣有善政 郁瑞典六康熙己丑進士授中書舍  
人幼時憂母疾籲天自代胡旨

譙江能古文有書黃將鄭蓋汝器號谷口性嗜六書構  
軍逸事敘述甚詳

奠尊嘗曰六朝  
遺意僅見斯人 朱延清子元事母孝口不  
言佛老之學金芝維藩請  
建

書院總督查弼納  
錢輝祖實孫居親喪三年  
居寢於外吳調元雨

蒼建順治丙辰舉人累官福  
朱豫介士諸生著拙真堂集  
劉西澗詩乘多採

人之孟尙鄰錦巢

性豪邁負大志爲山東泗水知縣忤上憲意罷歸

文震東育

諸生

教諭湯欲保舉之震俯首不應

其文行亦皆有可述者

張士駟字次隨句容諸生明鼎革後義不忍出學使楊爲賦招隱焉生平絕迹公庭後舉鄉飲大賓年八十一卒

宣芸字書城句容崇德鄉人父卒廬墓三年足迹不入城市康熙庚午中舉人爲寧國宣城教諭著有芹澗堂文集又著周程張朱四子集解

王弼字熙亮句容歲貢生學問純正著有四書口義一大全一孔子歷遊年譜秉燭記諸書

李東懷字兆三句容人嘗自言生平得力於精義二字博通經史工詩文稟性醇厚雍正癸卯舉人任寧化知縣卒於官

王芝藻字荇友溧水人康熙甲午舉人任婺源教諭陞泗州教授又陞湖廣邵陽知縣居官有賢聲著周易周禮春秋類義折衷史學提要六曹政典諸書

蕭秉晉溧水舉人有文集行於世因兄秉乾爲漕糧改折劬勩其間未遂抱負溧民至今頌惜之其同姓有必祚字永錫府學增生讀書善析疑義有枝菁字周莪能文善詩賦著有覺夢集二十卷

尹正鼎字變公溧水優貢篤志好學增刻五經圖行世  
同學稱爲老文獻

司徒琦字千子溧水縣廩生其族臨字于敦縣增生棠  
字際周縣拔貢生皆能文

劉曰珩字上玉江浦人由歲貢任四川石泉知縣博學  
高才嫻於著述纂有四書詩經說約行世卒後祀鄉賢  
劉巖字大山江浦人年十八始知讀書遂博極經史成  
誦終身不忘康熙癸未成進士任翰林院編修著有拙  
修齋稿大山詩行世

陸世忱字葵心六合諸生究心理學兼治諸經尤達於

易

吳以誠字思立六合人雍正元年拔貢生受業於方苞  
有詩學博依十二卷

戴之泰字連茹六合人乾隆戊午順天鄉試舉人授內  
閣中書卒於官著有周禮集解等書

孔尙熹字鵬翀一字胥翁高淳諸生研精經史與婁東  
復社諸人相應和鼎革後絕意進取布袍幅巾行歌野  
哭以抒其意所著有經史大成吳偉業爲之序

李茂英字君玉高淳人大父綬嘉靖時嘗代輸貧戶逋  
欠漕米一千五百石茂英博學能文尤善於詩竟以諸



生老所著詩詞俱刊行世

湯之孫字彥仍一字仍三高淳人性倜儻喜交遊福王時馬阮用事南都徧捕逃官羅織四起陳百史名籍捕中匿之孫家得免既而百史歸命

本朝之孫怏怏不復與相能後有撫員以迂時政內逮急求調劑於之孫之孫遠走京師說百史不少屈而百史亦心折事得平之孫生平慷慨之氣時託於詩惜稿多散軼不傳

程嗣章字南耕上元人國子監生嘗爲江蘇巡撫幕客適有邪教一案蔓延至數千人嗣章謂巡撫此輩皆愚

民盡殺之實傷好生之德請誅其首而釋其從巡撫從之嘗著史學例議明史紀略明儒講學考諸書

李鄴字泌仙上元人朱宰相忠定公綱之後爲人稜稜有風骨非其人不與言著有鷗天閣文集諸書

戴瀚字巨川號雪邨上元人父天章字麟郊好學強記瀚中雍正癸卯一甲第二名進士授編修督學福建屢遷至侍講學士工於詩文著有文集及編年詩乘弟濬字粒民號漸東又號樗園縣增生著易隅稽疑考濬子祖啟見儒林傳

葛祖亮字超人一字聞橋上元人乾隆丙辰恩科進

士官禮部主事負性慷慨不妄與人交著禮經千古要義二卷據禮通考五父十三母改正元典章三父八母之說而以服紀後編附之又著兩閣古文等書

和風翔字宇清上元人家世業農齟齬立邨塾外耳熟論孟少長學爲文倣史記論讚體不合制藝有嫺陳氏者示以前明先輩文數篇風翔曰得之矣試輒首拔入攝山受經於翁荃乾隆元年

詔修三禮方苞薦於朝徵至而卒苞爲作哀詞一章

秦大士字澗泉一字魯一江寧人乾隆壬申 恩科殿

試一甲第一名進士授修撰擢侍講學士能文工書

命授

皇子書最稱勤慎告歸卒長子承恩辛巳進士亦以文名相繼爲翰林後出爲監司陝西江西巡撫入至尙書都御史卒次子業亦繼爲翰林故稱盛族焉

鄒森字元春一字梁圃上元人乾隆壬申科舉人屢會試不第然至京未嘗一見要人達官或知其來欲先拜之森聞輒移寓或不俟試而先行矣貧窶日甚而讀書不少輟家人告斷炊不以爲病也晚選安東教諭爲文簡古清剛書法亦善

方步溟字曜薇一字融川上元諸生少而工文嘗兩試第一時方選拔貢生衆皆擬步溟而步溟亦不能舍祖

母赴京 廷試竟不與拔貢試其後學政李因培賢之  
舉優貢生步溟終以祖母年高不忍赴 廷試也年四  
十餘卒竟無嗣

職員朱濂六合人事節母以孝聞子本福廩貢生歷署  
淮安府學及銅山訓導性慷慨乾隆五十年不惜重貲  
助賑貧乏協修縣志戴學正稱其品學兼優不媿名父  
之子少負雋才著有管窺樓詩鈔謙堂遊草等集

樊明徵字聖謨一字軫亭句容人博學而精思其於古  
人禮樂車服皆考覈而制其器有受教者則舉器以示  
之不徒爲空言也故聞者易明著書四十餘種尤詳金

石之學

嚴長明字冬友一字道甫江寧人乾隆二十七年以獻賦

召試

賜舉人內閣中書入軍機辦事戶部奏天下雜項錢糧名目煩多請去其名而以其數併入地丁徵收長明日今之雜項古之正供也今法折徵銀若去其名他日吏忘之謂其物官所需民當供且再舉徵之是使民重困也大學士劉統勳曰善乃奏已之是時軍機有數大案賴長明在直任其勞獲成議擢侍讀連遭喪歸遂不復仕出遊

秦楚大梁卒於合肥書院長明博學工詩文在職纂修官書外其自爲書曰歸求草堂詩文集及論辨經史書算文藝金石文字者凡二十餘部百餘卷

談樸升字堯階號旦泉一號榆邨江寧歲貢生晚選常州府學訓導嘗自言生平於老師宿儒固所欽佩卽後輩一行一言之善未嘗不心識而竊效之也早工時文晚遂潛心經學所著有周易圖象通解諸書

周槩字于平明四川布政使周瑛九世孫也父榮光遷江寧槩好學博覽雅有巧思能以拳木造地球能以尺絹畫江河萬里其婢僕家人亦能知華嚴字母法時

以振奇人目之所著有闕里小志慢亭詩鈔諸書

陳毅字直方一字古漁上元人少孤貧事母盡孝當事欲爲汲引以母老病辭不就遂以布衣終毅早工文辭詩名尤著有攝山志諸書

陶湘字衡川江寧人乾隆辛卯科舉人早與程廷祚齊名一時有南陶北程之目性喜藏書著有春秋經傳集解補義與古文集藏於家

談秦字階平一字星符上元人性嗜學尤精天文歷算少詹錢大昕數與往復辨論極稱重之乾隆丙午科中鄉試舉人晚爲南匯縣教諭卒臨終時猶手不釋卷云



所著書凡三十種

韓廷秀字紹真江浦人乾隆庚戌科進士選廣西馬平知縣甫蒞任而遽卒廷秀端靜嗜學頗長經學古文惜死後書皆散佚

汪兆虹字玉飛上元諸生嗜學尊宋儒晝之所爲夜必書之以自省察惜不承年而卒

胡本淵字靜夫上元人嘉慶丙辰科進士官國子監學正以母老不仕歸性和易生平無疾言遽色好學能文所著有物始考三十卷歲時紀事二十卷子史輯要八卷愚谿詩集四卷文集四卷賦一卷